

太上說東斗主算護命妙經

老君告正一天師曰天道冥運文象玄應昭
而不言經星常宿中外官品各有司主凡一
百一十八名積數七百八十二星二十八宿
兩曜五星皆在璇璣以齊七政五天大號靈
斗帝君南北建候東西均平光極中央臨照
四方吾為汝說玄文洞章世人受誦變災為
祥至士得之玄景靈光吾已為汝說北斗本
命之訣南斗六司之文度人無量劫劫長存
吾今復為汝說玉靈瑞篇東斗帝君之名主
算延年使傳下世能度三塗五苦八難之厄
能與削死上生大計之令總監形魂玄妙莫
默無極無窮
老君曰東方之神以斗為隣長生大聖韓君
丈人執我之柄不死之神輔我之左長生之
君弼我之右司馬大神行我之政司命司錄
延壽益算無量受人青帝與我護魂太上與
我扶身已元醜伯魔王之真從我所願延救
天人急急如律令

呪曰

太上說東斗主算護命妙經

大道著明 寂默玄冥 五斗中運 四時生成
北都萬鬼 過人年齡 我有洞章 度世長生
供養專禮 主人精神 玄中有玄 峨峨玉京
急急如律令

東斗第一蒼靈延生真君

東斗第二陵光護命真君

東斗第三關天大術集福真君

東斗第四大明和陽保和真君

東斗第五尾極總監真君

老君曰凡人受誦必須至誠齋心東向叩齒
心拜跪坐閉目存神如見東方無極之鄉玄
靈帝君至真大聖無執之衆羅列周匝如得
監度有災之日宜於本命生辰或月之朔望
月之九日或家庭觀宇以時花珍果焚香靜
念望東斗帝君懺謝罪業求益壽年大靈所
與獲福無量至人授度道遠上清此經玄奧
深不可詳
太上說經周竟於玉局座謂天師曰玄文祕
法授非其人殃及九祖所以賜汝流行正道
救度天人令得長生天師再拜頂禮受之如

法奉行自此傳於世矣

太上說東斗主算護命妙經